

Communicaziun a las medias

Puntraschigna, ils 7 d'october 2020

Inaugurà il center da visitaders singular «Virtual Reality Glacier Experience» a Puntraschigna

La Banca Chantunala Grischuna pussibilitescha als visitaders da far in viadi virtual tras il temp ch'als maina en il mund dals glatschers e da l'aua

Ina nova exposiziun interactiva a Puntraschigna en l'Engiadin'Ota illustrescha las consequenzas da la midada dal clima. La «Virtual Reality Glacier Experience» permetta als visitaders a partir dals 10 d'october 2020 da far in viadi virtual tras il temp e da visitar il Vadret da Morteratsch. Pussibilitada vegn quella attracziun da la Banca Chantunala Grischuna (BCG) en il rom da ses giubileum da 150 onns.

L'exposiziun interactiva Virtual Reality Glacier Experience respunda a dumondas en connex cun il tema glatschers ed aua ed envida ils visitaders da far in viadi tras il spazi e temp. Persunas interessadas han la pussaivladad da far quatter differentas turas virtualas en il territori dal Vadret da Morteratsch che mainan ellas en il passà ed en l'avegnir. Differentes scenaris climatics illustreschan il regress da la lieunga dal glatscher. En pli exemplifitgeschan las turas virtualas tge che fiss pussaivel cun il project innovativ MortAlive dal glaziolog Felix Keller. L'idea da MortAlive: ennavar durant la stad la lieunga dal glatscher cun naiv artificziala producida cun aua dal glatscher ed uschia proteger la rasada da glatsch. E tut quai senza forza electrica. «Cun la nova attracziun sensibilisain nus la populaziun a moda bain chapibla per il regress dals glatschers e per la necessitad d'ovras da piunier. Scienzas fundadas cumbinadas cun in'intermediaziun da savida la pli moderna furman exact quella innovaziun che la Banca Chantunala Grischuna vul sustegnair», di il CEO da la BCG Daniel Fust. Tuttina sche pitschen u grond e tuttina sch'i sa tracta d'in public local u internaziunal – quest tema pertutga nus tuts.

A chaschun da ses giubileum ha la Banca Chantunala Grischuna creà ensemen cun partenaris enconuscents in lieu che renda palpabla la tematica dal clima. Ils ultims dus onns è vegnida sviluppada en l'anteriura ustaria da la staziun da val da Diavolezza in'attracziun che duai – en il senn dal giubileum da la banca – metter accents persistents: «Grazia a l'aventura virtuala sin il glatscher vegnan ils visitaders a savair quant impurtant ch'è il tema dal regress dals glatschers sin tut il mund e tge patratgs ch'il Grischun suonda per far frunt a quest svilup directamain al lieu», di il president da banca Peter Fanconi. Amez la natira genuina ed il massiv imposant dal Bernina fetschia in tal center da visitaders in effect optimal, cunquai ch'il regress dal glatscher capitia gist al lieu.

In viadi tras il temp che tematisescha ils glatschers e l'aua

L'exposiziun interactiva illustrescha ils effects da la midada dal clima per las Alps. «Sco la banca da las Grischunas e dals Grischuns agin nus natiralmain en il senn da l'economia, però adina en accord cun la natira e l'ambient», suttastritga Daniel Fust. Ed el punctuescha: «L'aua è l'avaina da vita dal chantun, il glatsch ha furnà nossas vals, l'aua minerala grischuna è ina da las meglras insumma e la forza idraulica proveda nus a moda fidada cun energia.» Sin var 250 meters quadrat pon ils visitaders far in viadi tras il temp ch'als maina dal passà en l'avegnir. Ils eglers da virtual reality ed il holoscreen, in grond monitur interactiv, permettian ad els da vesair scenaris pussaivels da las midadas dal Vadret da Morteratsch dal 1875 fin il 2100. Ils visitaders pon sa participar activamain a l'exposiziun e per exempel gidar a dumbrar las urblaunas. En pli vegn preschentada

in'innovaziun svizra en la VR Glacier Experience: NESSy ZeroE. La lantscha da naiv patentada producescha naiv artificziala senza electricitad. Tge muntada che questa innovaziun ha exemplifitgescha il project MortAlive che vul spendrar ils glatschers en tut il mund.

Al puls da la scienza

L'exposiziun fundada scientificamain è vegnida pussibilitada grazia a la stretga collavuraziun cun la Scola auta turtigaisa dals arts e cun l'Universitad da Friburg. Quels dus instituts han sviluppà ils dus onns passads models da glatschers detagliads ed han creà a Puntraschigna il mund virtual dal Vadret da Morteratsch. A partir dals 10 d'october 2020 è averta mintga di l'exposiziun Virtual Reality Glacier Experience situada a la staziun da val da las pendicularas da Diavolezza e quai per personas singulas, famiglias e gruppas. L'entrada è gratuita.

#gkb2020: il giubileum da 150 onns s'orientescha a l'avegnir

La Banca Chantunala Grischuna ha da bell'entschatta concepì sias festivitads da giubileum cun la finamira da laschar fastizs. La banca na vuleva betg celebrar sasezza. Cun #gkb2020 saja quai reussi, bilantschescha Daniel Fust ed enumerescha intgins highlights dal program da giubileum #gkb2020. «Ensemen cun la firma TRUMPF Schweiz AG a Grüşch avain nus posiziunà da nov la fundaziun INNOZET ed avain uschia mess in accent en la promoziun da startups. La plattafurma da commercialisar musica «Graubünden Musik» e noss engaschi intensivà per la cultura, il sport, l'economia, il champ social e l'ambient stima la publicitad ordvart fitg. Cun ils cudeschs electronics dal piz creain nus muments nunemblidaivels en las muntognas per pitschen e grond. Ils novs bigls sin la Grossalp en Val Stussavgia stattan simbolicamain per in project ch'è vegnì realisà grazia al Climaqua Fond da l'Allegra Passugger Mineralquellen AG.» Confurm al motto da la BCG «Metter accents persistents per l'avegnir» han tut quests projects in effect ed in niz era suenter l'onn da giubileum.

Contact per las medias

Banca Chantunala Grischuna
Thomas Müller
+41 81 256 83 11
thom.mueller@gkb.ch

Fotos e videos

www.glacierexperience.com/medien

Banca Chantunala Grischuna – il leader en il Grischun

La Banca Chantunala Grischuna porscha tut quai ch'i dovra per ina banca universal moderna – per personas privatas, l'economia ed il maun public. La banca occupa 1015 collavuraturas e collavuratur (stadi dals 30-06-2020). En il chantun Grischun cun sias numerusas vals e pliras linguas è l'interpresa represchentada cun 50 agenturas, la sedia principala sa chatta a Cuira. La Banca Chantunala Grischuna è participada a la Banca privata Bellerive AG a Turitg ed a l'Albin Kistler AG medemamain a Turitg. En il rendaquint semestril preschenta ella cun ina summa da bilantscha da CHF 30.9 milliardas in gudogn dal concern da CHF 95.2 milliuns. Il scrit da participaziun BCG è quotà a la bursa dapi ils 10 da settember 1985.

Termins

Quint annual 2020: 4 da fevrer 2021
Radunanza dals participants: 24 d'avrigl 2021